


卷  
七  
七





大清文宗協天翊運執中垂謨懋德振武聖孝淵恭端仁寬敏  
顯皇帝實錄卷之七十七

咸豐二年壬子十一月丁卯諭內閣揚殿邦奏臨清州牘外  
河神顯應請加封號一摺並另片奏該州紳民稟請捐貲建  
廟等語本年南糧首幫輓入東境正值衛河盛漲而浙船行  
抵臨清又在冬令水落之時經督運文武各員先後詣

金龍四大王廟暨

漳神祠虔誠叩禱重運漕船得以全數出牘首二兩進回空  
幫船亦得趁水連檣南下

神靈默佑欽感良深著禮部各擬二字封號進呈候朕酌定



加封。以昭

靈。既至該州所轄尖冢地方。為豫省漕船必經之路。既據該紳民等稟請建立。

金龍四大王暨

漳神祠廟。著即准其捐貲興建。用申祈報。○又諭黃宗漢奏。藩司自盡出缺一摺。據稱浙江布政使椿壽。於本月初九日夜間。在署自縊。另片奏浙江錢漕諸務支絀。本年久旱歲歉。徵解尤難。該司恐誤公事。日夜焦急。以致迫切輕生。而椿壽遺囑內有因情節所逼。勢不能生之語。並未指明係何情節。該司以二品大員。即令公事難辦。何至遽行自盡。是否另有

別情。著該撫再行詳細訪察。據實奏聞。毋稍隱飾。尋奏該司因庫款不敷。漕務棘手。致肝疾舉發。因而自盡。並無別情。報聞。○又諭德勒克多爾濟等奏喀爾喀兩部落汗王貝勒貝子公扎薩克台吉等。因賊匪滋事。捐銀二萬兩。以備軍需。一摺。喀爾喀圖謝圖汗車臣汗兩部落汗王等。聞賊匪滋事。請捐銀二萬兩。實屬忠心出於至誠。惟軍營應用銀兩。現已備妥。足敷支用。且念蒙古人等。生齒日繁。全賴此項銀兩生計。若遽行收納。朕心深為不忍。況各省大兵。已將雲集。蠢爾么膺。必可立時撲滅。所捐銀兩。毋庸賞收。以示朕軫恤蒙古世僕至意。德勒克多爾濟捐輸本身銀二千兩。實屬誠悃。著即



賞收。加恩交該部從優議敘。○又諭。德勒克多爾濟等奏。哲布尊丹巴呼圖克圖庫倫堪布諾們罕。率領喇嘛等捐銀一萬兩。呈請轉奏一摺。該呼圖克圖等。甫聞賊匪滋事。情願捐銀一萬兩。實屬忠心出於至誠。惟現在軍需。尚屬饒餘。足敷支用。所捐銀兩。著毋庸收納。並著賞給該呼圖克圖呼畢勒罕黃哈達一塊。轉交諾們罕。俟伊師哲布尊丹巴呼圖克圖呼畢勒罕坐牀後。再行賞給。其發去賞給庫倫堪布諾們罕羅布桑楚勒特木濟斯默特哈達一塊。俟接到時。著德勒克多爾濟等。轉行賞給。以示朕嘉尚呼圖克圖等之意。○又諭。陸建瀛。奏。參浙江總運幫弁。請旨分別議處革職一摺。浙江

台州前等四幫漕船。因冬令水淺。行至丹陽一帶。不能前進。經陸建瀛奏明。飭令折回。乃各幫弁。藉詞觀望。屢催罔應。以致來往船隻。均被阻滯。湖州府總運浙江候補運副湯世勳。著交部嚴加議處。首先抗違之温州前幫千總黃振。著即革職。並著黃宗漢。速飭新任糧道周起濱。馳赴該處。督飭湯世勳等。將各幫重運漕船。概行折回湖州水次。聽候酌辦。如再抗違。即著嚴參治罪。沿途水手人等。即責成該道押令安靜行走。並著江蘇地方官。一體妥為彈壓。毋致滋生事端。○又諭。陸建瀛奏。飭緝匪徒。擒獲多名等語。江蘇邳州境內。有山東捻匪靳豹等竄入。經署邳州知州吳崇。會營帶領兵勇。馳



往堵拏。該匪折回竄逸。復跟蹤追趕。至郟城沭陽交界之高唐溝。獲犯五名。海州知州毓彬。派委千總秦懷揚等。於郟城縣馬陵山等處。先後獲犯十一名。該州復會同署參將游桂林。親督秦懷揚。並署守備朱大平等。於阿湖鎮附近地方。生擒二十七名。格殺二名。奪獲槍礮。刀械。羸馬。火藥。鉛丸等物。邳州。海州。文武各員。不分畛域。追逐緝捕。擒獲匪犯多名。辦理尚屬認真。著陸建瀛。楊文定。即飭該員等。將現獲各犯。嚴行審究。並著李德。督飭山東交界地方文武。迅速合力嚴拏著名擒首。及夥黨全數。弋獲。以懲兇暴而安善良。○諭軍機大臣等。前據陸建瀛覆奏。小孤山設防。不如於上游黃蘄等

處扼險防堵。當降旨諭知徐廣縉。常大瀉等。照辦。並令該督撫等。察看地方要隘處所。豫籌防守。茲據該撫奏稱。小孤山實為長江之鎖鑰。皖省之門戶。斜對南岸彭郎磯。南寬里許。北寬半里。兩岸擡礮並發。均足擊及中流。彭郎磯背緊靠江濱。並可安放大礮迎擊等語。該撫既經委令升任雲南臬司張印塘。親詣查勘。派兵馳赴防堵。並添造船隻器械。雇募水勇操演。即著照議妥辦。前有旨。令張印塘留於安徽辦理防堵事宜。著蔣文慶。即飭該員會同張熙宇。恩長。悉心籌辦。所募水勇。能否得力。務須操練純熟。不可有名無實。粵楚地方。每因奸匪勾串內應。以致失事。現在辦理防堵。無論城鄉水



陸總以盤查奸細為第一要務。一切布置機宜。尤須加意慎密。使賊無從探聽。而賊中情偽。又必應確偵豫防。方不至墮其奸計。其界連湖北江西之英山霍山太湖婺源祁門建德等縣。並著嚴密設防。毋令賊匪竄入。將此由六百里各諭令知之。○又諭都察院奏吉林漫局商人周萬春呈控協領富尼雅杭阿盤踞漫局。勒扣幫費。故縱攬頭籽種秧。漫一案。已明降諭旨。交恩華趙光審訊矣。據稱此案曾在步軍統領衙門控告。奉旨交吉林將軍訊辦。該局員等消弭賄託。勒派幫費。並虧短價銀等情。著該侍郎等按照所控情節。逐層嚴訊。務得確情。儻有牽涉該將軍副都統之處。即著查取親供。據

實具奏。所有該商人供呈共四件。並帳簿十五本。均著發給閱看。將此諭令知之。○安徽巡撫蔣文慶奏派兵防守小孤山。並添造船隻器械。雇募水勇。遴員操演。得旨。雇募各勇。藉助先聲。則可以之禦賊。朕難保必期得力。○以山西按察使麟桂為浙江布政使。調河南按察使沈兆澐為山西按察使。賞已革河南布政使張集馨四品頂帶。為河南按察使。○戊辰。

上詣

大光明殿。

弘仁寺。



仁壽寺拈香。○諭內閣。穆騰額奏。班禪額爾德尼。七旬生辰。接受賞件。呈請謝恩。並呈進吉祥丹書克。乞為轉奏一摺。班禪額爾德尼。歷居後藏有年。深通經術。推演黃教。且其照顧喇嘛黑人。為年更久。茲又請進丹書克。其誠懇之忱。朕心尤為歡悅。著照所請。准其交明年年班進京之堪布。代為呈進。○改鑄陝甘總督關防。從總督舒興阿請也。○己巳。

上奉

皇貴太妃幸漱芳齋進膳。○諭軍機大臣等。現在賊入長江。直犯武昌。漢陽二郡。下游江防。最關緊要。本日軍機大臣奏。有人呈稱。宜用木筏收束江面。如牖口式。使賊船不得暢行。再

於隘口擊之。其法各於江面較窄之處。多用木筏橫截彼岸。連以鐵鉤。防賊衝越。覆以溼土。防賊焚燒。彼岸既阻。賊船必由此岸魚貫而下。我兵即於牖口設防。係平坦處。則多設礮位。係高阜處。則多安滾石。彼過一船。我擊一船。每數十里。或一二百里。安設一牖。若賊過第一牖。則將上牖木筏。多用火具燒然。順流放下。使賊船至第二牖時。前有牖阻。後有筏燒。各等語。長江一帶。木筏本多。若任其為逆匪所得。更助兇燄。自應豫為收集。藉作江防。惟當如何運用。何地安設。尤須層層慮及。方免疏虞。著徐廣縉。常大瀉。陸建瀛。楊文定。蔣文慶。張芾。各就江面情形。悉心體察。不必拘定如此辦法。總期因



地設險。毋資賊用。惟賊情詭詐。若圖北竄。勢必水陸兼下。牽掣我兵。沿江州縣。陸路要隘。亦必須處處扼險防守。不可顧此失彼。將此由五百里各諭令知之。○又諭。有人奏。湖北省城。拏獲奸細數十人。現皆監禁等語。賊匪正在武昌。漢陽。盤踞。城中奸細必多。已獲之犯。訊明如果屬實。即應正法。以絕句串內應。切勿遲疑。致滋他變。近日失陷城池。多因奸細。洵入著徐廣縉。常大瀆。密飭地方官。無論城鄉要隘。均應嚴密盤查。不可稍有疏忽。逆匪等。自岳州竄徧湖北省城。圍撲漢陽。及龜山營盤。情形緊急。數日來未接徐廣縉奏報。朕心實深焦灼。屢經降旨。令向榮趕緊赴援。並令徐廣縉督飭大兵。

星速前進。不知此時如何攻勦。向榮雖經獲咎。而該大臣仍令其統領諸軍。朕亦念其前守桂林之勞。停其發遣。俾令趕赴長沙。協同固守。兩月以來。尚無貽誤。此次賊匪北竄岳州。向榮不能迅速救援。而其趕派常祿。王錦繡。帶兵星馳赴援。武昌。到在賊前。見事尚屬機警。向榮久於行陣。朕看其屢次舉動。尚非無用之才。此時武昌戒嚴。正伊奮激圖報之日。如能迅速勦賊。不但可贖前愆。並可重邀恩眷。著徐廣縉。即將此旨宣示向榮。俾知感勵。朕用人一秉大公。功罪皆由自取。想該革員必能仰體朕始終成全之至意。將此由五百里諭知徐廣縉。常大瀆。並傳諭向榮知之。○又諭。陸應穀奏。河南



與湖北交界地方。防堵喫重。請飭催前調官兵一摺。前已有旨。調山東官兵一千名。山西南鎮官兵三千名。馳赴河南防勦。現在賊勢猖獗。楚豫交界地方。堵勦十分喫緊。著李德。郭夢齡。迅派得力將弁。管帶挑選精兵。星速啟行。馳往河南。以資調遣。毋得稍有延誤。將此由五百里各諭令知之。○又諭。陸應穀奏。豫省防堵喫重。請飭催官兵一摺。已由五百里諭令李德。郭夢齡。將前調山東兵一千名。山西兵三千名。迅速飭催前往矣。前因賊匪北竄。曾諭令陝甘督撫。再選精兵二千名。西安將軍。選備駐防官兵一千名。星速馳赴河南。昨又諭令訥爾經額。將挑選大名鎮標兵一千名。先行派往。交該

署撫調遣。此項官兵。計日均可先後趕到。該署撫。務須隨到隨撥。於信陽。羅山。二屬。及新野等處。相度要隘。層層布置。並察看情形。如必須出省調度。即行擇要前往駐劄。督同鄭敦謹。柏山等。設法堵禦。現在琦善。即日出京。續調各省精兵。已催令迅速馳赴豫省。該署撫。仍俟琦善到後。再行交卸來京。至南陽一帶。素為捻匪出沒之區。難保不乘機竊發。或與逆黨勾結。不可不防。著督飭地方官。於團練保衛之中。即隱寓鈐制之意。總以鎮靜彈壓。毋涉張皇。是為至要。將此由五百里諭知陸應穀。並傳諭鄭敦謹。柏山。知之。○署河南布政使鄭敦謹。奏報到任日期。得旨。豫省為北方保障。防堵事宜。最



關緊要。其實心慎密辦理。以副委任。○甘肅甯夏鎮總兵官穆特恩奏。奏報到任日期。得旨。邊疆重地。操練為先。汝其勉力整飭。不可因循。○蠲緩湖南武陵。龍陽。沅江。澧。安鄉。巴陵。臨湘。華容。湘陰。九州縣。及岳州衛。被水歉收地畝。新舊額賦。並貸安鄉縣。無力貧民麥種。○庚午。

上詣

壽康宮。問

皇貴太妃安。○以祈禱靈應。頒山東登州海口

天后廟。

御書扁額。曰神功濟運。○諭內閣。昨日兵部帶領引見之齊齊

哈爾鑲黃旗協領巴揚阿。黑龍江鑲紅旗協領富尼雅綱阿。  
墨爾根城鑲白旗協領經文。齊齊哈爾鑲紅旗協領福祥。黑  
龍江鑲紅旗佐領拜爾胡蘭。墨爾根城鑲紅旗佐領那豐阿。  
齊齊哈爾鑲紅旗佐領伯起。打牲正紅旗佐領和山。黑龍江  
正藍旗佐領烏里布。黑龍江正紅旗防禦富勒德恩布。黑龍  
江鑲黃旗防禦富興。黑龍江鑲紅旗驍騎校阿勒精阿。打牲  
鑲黃旗驍騎校海舍。打牲正白旗驍騎校勒慶阿。打牲正黃  
旗驍騎校業普鏗額等。十五員。均著交琦善帶往河南。差遣  
委用。○又諭直隸務關路參將李志和。著交琦善帶往河南。  
差遣委用。○又諭御史周有蓋奏。軍營員弁。浮冒錢糧。請嚴



行稽覈一摺。據稱軍營統兵員弁。希圖浮斂錢糧。捏報名數。以少報多。管帶練勇之員。亦皆效尤。陣亡兵勇數目。並不據實開報。總局大員。明知不查。豫為奏銷地步。致軍需要款。半歸私橐。所奏切中情弊。自軍興以來。屢經該部行查調兵到營日期。及傷亡裁撤數目等款。並未據該省奏到。其為意存虛捏。已可概見。當此紛紛籌餉之時。何堪任聽劣員。從中漁利。著現在辦理軍務之大臣。督撫等。嚴飭管理糧臺總局各員。詳細稽查。即將藉端舞弊。昧良肥己劣員。指名嚴參。以肅功令。而慎度支。又片奏。各省動用帑項。每於奏銷時。先遣人與戶部經承議定部費。豫防部駁等語。各部院衙門書吏。因

公需索。大干例禁。著各該堂官。督飭司員。隨時密查。如有部費名目。及各項弊端。著即奏交刑部。嚴行治罪。毋稍姑容。將此通諭知之。○諭軍機大臣等。前因湖北賊勢猖獗。安徽河南。均須防堵。先後降旨。調山東精兵三千名。分赴各該省協防。茲據李德奏稱。東省額兵不多。時須派捕捻幅各匪。又應分巡回空軍船。未便徵調等語。自係實在情形。惟皖豫兩省。與湖北交界地方。防堵緊急。著李德仍遵前旨。將調赴安徽兵二千名。河南兵一千名。迅即派委得力員弁管帶。星速前往。毋稍遲誤。如安徽河南。續調兵力。足敷調遣。再行奏明。將該省之兵撤回歸伍可也。將此由五百里諭令知之。○烏什



辦事大臣春熙奏。查閱卡倫軍臺等處官兵軍械馬匹得旨。此等事件。應用清字摺。滿洲舊俗。豈可忽略。若遇緊要事件。可用漢字摺。汝清文生疏。亦不必拘泥。○辛未。

上詣

壽康宮前殿行禮。後殿問

皇貴太妃安。○詣

英華殿拈香。○御乾清門聽政。○諭內閣。軍興以來。將兩年矣。廣西瘡痍未復。湖南又遭塗炭。近乃逆氛更熾。擾及武昌。漢陽。所過郡縣。悉被蹂躪。雖桂林。長沙。兩省城。幸保無虞。而我民之遷徙流離。亦已不堪言狀。朕御宇三載。未能安輯四

方。俾我民咸登衽席。深宮自省。豈止寢食不安。因思軍營將帥及各督撫大臣。皆

先朝舊臣。留為保我子孫黎民之用。際此時艱孔亟。宜如何同心協力。奠我蒼生。以輔朕之不逮。朕為吾民請命。不憚祈禱。頻仍。每閱軍報。至地方被害情形。朕心如搗。前命徐廣縉。統領大兵。分飭提鎮。追剿羣匪。直抵武昌。復命陸建瀛。蔣文慶。張芾等。各督官兵。泝流迎擊。昨又命琦善。統帶各省馬步精兵萬餘。屯守河南南陽。汝甯。光州。一帶。為楚應援。另調吉林。黑龍江。勁旅。隨後接應。合三省之兵力。不分畛域。直趨湖北。合力攻剿。逆賊以左道煽惑愚民。肆行搶掠。荼毒生靈。實屬



覆載不容。神人共憤。經我軍疊次殲戮。外其兇悍之賊。不過數千。餘眾大半皆裹脅之徒。其甘心從逆者無多。揆之天道人心。賊匪惡貫滿盈。必當指日殲除。不致久為民患。朕不惜數千萬帑金。藉資勦辦。本日又特頒部帑。以濟軍需。此外仍飭寬為籌撥。源源接濟。該大臣督撫等。均當仰體朕心。為民除害。行軍之道。紀律為先。務須信賞必罰。約束嚴明。俾知有進無退。人皆用命。即小勝小負。亦兵家之常事。總宜據實奏報。不可稍有粉飾。朕賞功罰罪。悉以軍報為衡。儻有偏重偏輕。何以令在營軍士。知感知懼。至團練鄉勇。乃民間自為守禦。藉以保衛身家。或各村自為一團。或數村共為一團。其經

費。應由紳董自行經理。豈可官為抑勒。且以守望相助之傳。輒復紛紛調遣。必至遷地弗良。轉滋流弊。民間捐助軍餉。好義急公。朕方破格恩施。若地方官藉捐輸為名。委員四出。苛派騷擾。胥吏因緣為奸。又何以安善良而昭激勸。即如會籌軍餉條款內。稅契一節。亦國家成例。然或辦理不善。亦足以滋擾累。朕宵旰焦勞。冀蘇民困。吾民一日不安。朕心一日不釋。前此被賊滋擾省分。屢經降旨。令該督撫查明奏請分別蠲緩撫恤。茲者岳州失守。擾及武昌漢陽一帶。眷懷南服。憂思益深。若再令疆吏飭屬照常徵納。小民其何以堪。著該督撫悉心體察被賊地方。分別蠲緩。奏請恩施。其餘應行徵收



錢糧之處亦著嚴查各州縣總期照舊開徵毋得稍有浮勒庶幾吾民於顛沛困苦之時不至再受追呼迫切之累該大臣督撫等即刊刻謄黃徧諭閭閻其各仰體朕意速振軍心用殲羣醜毋再因循玩泄致干重罪將此通諭知之○又諭慶錫奏籌議安裝涵洞柵木一摺

東陵風水圍牆南面涵洞應添木柵改安木橋所需工料著准其在於修辦河道繳回銀兩項下覈實動用所需木料著在本年海樹回乾木內選用此項工程著免其造冊報銷○諭軍機大臣等本日據陸建瀛張芾各奏江防緊急情形已降旨飭令分投防勦並明降諭旨剴切通諭矣逆匪竄入長江

攻撲武昌漢陽一帶前據常大瀆奏報後又逾數日未得續報徐廣縉自報岳州失守以後亦無奏報是否因道路梗塞文報不通朕南望殷憂莫名焦灼現在武昌城守情形若何徐廣縉向榮是否已統帶大兵繞赴湖北逆匪後隊如尚留踞岳州作何分路攻擊湖南兵勇數萬急宜趨赴前途或由江西捷徑繞赴武昌或取道蒲圻一帶將陸路竄撲武昌東門之賊翦除並將被賊占踞之大洪山等處即行奪回省城形勢既壯自能保固至漢陽切近省城情形危急必應迅速分兵救應賊眾精銳不過數千餘皆裹脅現在聲稱數萬大半烏合之徒總以合力攻勦為第一要義若但紛紛防堵則



水陸四達。防不勝防。徐廣縉抵武昌後。當權衡全局。一面憑城固守。一面飛咨荊州將軍台湧。督兵東下。並知會下游各省師船。泝江西上。迎頭截擊。及河陝北路之兵。亦可由襄陽建瓴而下。乘賊首尾勢分。揀選精銳。併力兜勦。勿但株守一隅。毫無布置。致賊匪肆行無忌。徐廣縉業已遷延於前。若再任賊蔓延。自問當得何罪。再昨已有旨切諭向榮。該革員久歷戎行。尚屬可用。因思蘇布通阿。係向榮推引。賽尚阿奏令來營。前據徐廣縉奏明。已飭管帶川兵前進。該員如果得力。可令與向榮會同督帶鎮將。奮力衝鋒。以期克敵制勝。軍營惡習。爭功妒能。最易誤事。向榮與蘇布通阿。平素既無猜嫌。

臨陣必互相應援。不致掣肘。該大臣到營日久。於諸將材質高下等差。諒已確加辨察。尤當隨時激勵鼓舞。使之齊心勦力。勿蹈前此覆轍。師克在和。此語當時刻銘心也。至大營兵勇雖多。患在未能選練。團勇一項。尤不足恃。急宜分別良莠。妥為裁遣。以整軍威而節濫費。本日據戶部片奏。請將兵勇去留確數。在營月日。及節次傷亡弁兵數目。分晰造報。著即照所議迅速辦理。原片鈔給閱看。隨營各勇名目甚多。人數甚眾。儻一時難於盡遣。亦須酌量緩急。不動聲色。設法妥辦。俾留營者。驅使可收實用。而遣散者。亦不至別滋事端。方為妥善。前有人奏。湖北形勢緊要一摺。著摘要一併鈔給閱看。



將此由六百里各諭令知之。○又諭陸建瀛奏豫籌三省防堵。張芾奏先委臬司馳赴九江防堵各一摺。前因岳州失守。疊經降旨。諭令毗連各省迅速設防。現在賊匪攻撲武昌。及漢陽一帶。其下游各省處處可通。急應嚴密防堵。俾不至分路竄擾。而江西之九江府。水陸皆與楚北毗連。尤為扼要之地。前有旨令張芾督兵堵禦。茲據奏已委臬司惲光宸前往會同該護鎮道暨署總兵音德布遊擊薛升堂並革員劉熾昌等籌辦。張芾著仍遵前旨馳往督率調度。省城重地。陳孚恩與陸元烺等仍當全局籌畫。勿稍疏虞。所調鎮江舢板船僅四隻。雖有水師方翔統帶。是否足資抵禦。陸路及江岸扼

要處所。亦必須派兵設礮。互為接應。至安徽省雖在江西下游。而順流而下。片帆直達。已據蔣文慶在小孤山擇要設防。前經降旨令張熙宇張印塘恩長等督辦。諒不至稍有疏虞。惟賊情詭詐。必須水陸皆有準備。方不至顧此失彼。本日本已明降諭旨。令徐廣縉琦善與陸建瀛等三面兜剿。現在河工軍務均關緊要。陸建瀛著仍遵前旨酌量情形。如須親往督兵調度。即星夜馳赴九江上游一帶扼要處所。與張芾蔣文慶等相機布置。並隨時知照徐廣縉琦善等合力進攻粵楚前調安徽之兵。此時能否撤回。並著咨商辦理。江西之兵如能迎赴上游。亦可助楚北聲勢。至江蘇撥餉。若全數截留江



西。安徽。不知楚省能否敷用。軍情緩急。難以懸揣。該督等。亦應與楚省督撫。隨時咨商。不可稍分畛域。致誤事機。河南前調清江浦礮三十尊。著即運往以濟急用。前諭令將圖山關以下。及各江洲所設之礮。暫移水陸要隘備用。想陸建瀛。亦已計及。江防雖有遠近緩急。必須層層布置。尤應於陸路險要設防。不可稍有疏忽。又聞奸匪到處潛蹤。其衣服髮辮。暗有記號。亟應嚴密搜查。以清內患。本日有人奏。議防不如議。勦各摺片。一併摘要鈔給閱看。將此由六百里各諭令知之。

○又諭。刑部尚書周祖培奏。通籌豫省軍務一摺。據稱河南南汝光一帶。皆與楚北接壤。自宜擇要固守。尤應防勦兼施。

團練鄉勇。藉資守禦。徐廣縉統帶大兵。既可窮追而北。琦善新調勁旅。亦可迎勦而南。等語。著該署撫。察看地方情形。應如何團練鄉勇。方能得力。不致別滋流弊。隨時隨地。相機辦理。湖北。江西。安徽。江蘇。各督撫。並著隨時知會。聯為一氣。水陸並進。南北夾攻。使賊匪腹背受敵。庶不再致蔓延。至所奏懷慶府河內縣清化鎮地方。突來他省客商開設錢鋪。囤積米糧。信陽。光州。一帶。有大幫難民。恐多奸細。溷雜。又聞賊匪潛來內地。其衣服髮辮。暗有記號。並著該署撫。遴派幹員。前往各該處嚴密稽查。儻有形跡可疑之輩。立即嚴行控捕。勿令匪黨溷跡其間。至捻匪鹽梟。所在皆有。必須設法鈐制。



寶鑑卷之九  
以免句結。以上情形。琦善未到以前。即著陸應穀。妥籌辦理。毋誤事機。原摺均著鈔給閱看。將此諭知琦善。並由六百里諭令陸應穀知之。○賞署河南巡撫琦善。二品頂帶。○以通政使司通政使羅惇行。為都察院左副都御史。光祿寺卿潘曾瑩。為內閣學士。兼禮部侍郎銜。內閣侍讀學士李維翰。為太僕寺卿。○蠲緩安徽靈璧。宿懷甯。桐城。潛山。宿松。望江。南陵。銅陵。東流。當塗。蕪湖。繁昌。壽。懷遠。定遠。鳳臺。潁上。霍邱。亳泗。盱眙。天長。二十三州縣。被水被旱。歉收地畝。本年額賦。○士申。

上詣

宣仁廟

凝和廟

普度寺拈香。○諭軍機大臣等。寄諭欽差大臣署湖廣總督徐廣縉等。御史陳慶鏞條陳軍務一摺。朕詳加披覽。所奏不為無見。昨因兩載軍興。生民塗炭。深宮自省。寢饋難安。特降旨宣示朕意。並曉諭統兵大員。嚴明紀律。信賞必罰。復令查明被賊處所。分別蠲緩撫恤。該御史現尚未覩明詔。而所請特沛綸音。刊刻謄黃。與昨降諭旨。實相照合。其所陳各節。亦切中時弊。當此防勦喫緊。首重人和。如地方官能得民心。鎮將等能得兵心。何患不眾志成城。同仇敵愾。至所稱寬脅從



寶錄卷七十七  
以散賊黨。練精銳以遏賊鋒。惟在統兵大員。體察民情。振作士氣。俾賊勢日孤。軍威日壯。庶可埽此妖氛。其有能擒斬逆首者。除賞銀十萬兩外。即封爵之榮。世職之賞。朕亦不吝。該大臣等。即懸示賞格。俾人人曉諭。儻陷於賊營之人。有能殺賊效命。自拔來歸者。亦可予以自新。加之重賞。其將弁兵勇。有不用命。及退避不前者。即分別嚴懲。無稍姑息。該御史摺鈔給閱看。即著採擇籌辦。前據陸建瀛奏。防江之法。以黃州府所屬之蘄州。廣濟等縣。為最要。雷以誠奏。沿江情形。亦甚詳覈。茲發去武昌下游各要隘說帖一紙。其所稱青山。陽邏鎮。武磯頭。道士洲等處。均可設防。著該大臣督撫等。體察情

形。嚴密防禦。水路固屬緊要。陸路尤不可忽。該匪駕船竄駛。必有陸路奸細。為之接引。若於陸路要隘處所。暗伏兵勇。多備槍礮。則賊船經過。何難轟擊殲擒。該大臣督撫等。務當不分畛域。全局籌畫。勿稍疏虞。將此由六百里各諭令知之。○又諭。前因賊匪北竄。降旨令舒興阿。張祥河。派員於楚省交界地方。扼要嚴防。本日據御史陳慶鏞奏。湖北間道。自襄陽至鄖陽。即可入陝西商州等語。著舒興阿等。仍遵前旨。於楚陝毗連南山一帶。要隘妥為布置。先事豫防。勿致臨時失措。仍當鎮靜持重。毋稍驚擾為要。前調西安駐防官兵。此時想已行抵河南。舒倫保。仍將存營官兵。加意操練。以資捍衛。毋



稍疏懈。將此由五百里諭令知之。○又諭前因江防緊要。屢次降旨。令陸建瀛酌度情形。如須親往督辦。即著馳赴上游。扼要調度。現已數日。未接湖北續報。賊氛方熾。難保不順流東下。擾及沿江一帶。該督前奏守禦長江。惟有力爭上游之法。所見極是。昨復奏江西省將有水陸受敵之勢。若賊匪闖入九江。無隘可扼。安徽小孤山。亦僅於下游設防。未能力據上游。該督籍隸湖北。於長江形勢險要。素為熟悉。此時武昌。漢陽。戒嚴。恐無暇顧及江防。江西兵力。又形單薄。朕再四思維。湖北黃州。蘄州。廣濟等處。沿江險隘。恐有疏虞。所關甚重。著陸建瀛。迅即馳往九江上游。扼長江之險。援應湖北。即為

江西。安徽。自固藩籬之計。軍事變遷。旦夕不一。必須籌之於先。庶免臨時倉猝。朕聞黃州迤南百二十里。為道士洲。江面最窄。有山可據。地勢極為險峻。應否於此地扼守。與徐廣縉南路之兵。互為聲援。一面與蔣文慶。張芾。熟籌布置。賊情詭詐。必不專由水路前來。其陸路險要地方。亦恐該匪勾結土匪。與水路船隻互相牽掣。仍須水陸兼顧。毋致失險。即如昨諭該督等。收集木筏。藉作江防。亦須斟酌行之。不可拘泥。沿江船隻。必須豫先收集。以備我用。毋為賊匪所得。豐工亦在喫緊之際。該督啟程後。即責成楊以增。督同查文經。竭力妥辦。並飭該鎮道等。認真彈壓稽查。務須趁此天氣晴和。料物



寶鑑卷之十  
充足之時。催令進占。剋期合龍。該河督係專管河務。查文經亦兩次派辦河工。責無旁貸。儻再因循誤事。朕惟揚以增。查文經是問。青慶於河工本非所習。因其任滿回京。暫令在工幫同彈壓。非特派督辦者可比。楊以增等不得藉詞諉卸。青慶亦不可另出己見。祇須按照陸建瀛等所定章程。迅速催辦。合龍後。即行來京可也。浙江糧船阻滯丹陽河道。此時是否全行折回。並著附報覆奏。以慰懸念。將此由六百里諭知陸建瀛。楊以增。青慶。並傳諭查文經知之。○改鑄貴州貴筑縣知縣印信。儒學條記。天柱縣知縣印信。儒學條記。天柱營都司關防。從巡撫蔣蔚遠請也。○癸酉。諭內閣著派火器營

官兵四十名。齎帶火箭二千枝。並各旗營火藥二萬斤。由驛前往河南。交琦善差遣備用。○又諭。本日據徐廣縉馳奏。十一月十八日。行至湘陰途次。探明漢陽府城失守。並查明岳州文武。先期逃散情形一摺。覽奏曷勝憤懣。自賊匪攻竄岳州。疊經降旨。令徐廣縉統帶大兵。分飭提鎮。直抵武昌一帶。繞出賊前。迎頭截擊。茲據奏稱。該大臣暫駐湘陰。並稱向榮於初七日帶兵。直逼岳州府城。趕緊進攻。賊匪紛紛逃竄。兵勇登時搶上。殺斃數十名。生擒二十七名。因該匪大隊已去。向榮率兵緊追。福興。玉山之兵。尚在向榮之後。蘇布通阿等。又在福興之後。疊次嚴催。總未迅速趨行。以致賊由水路順



流直下。岳州文武當賊未至。先自逃散。並未聞有帶兵迎擊之事等語。不料該文武等昧良喪心。一至於此。除已革提督博勒恭武。由該大臣迅速查奏外。岳州府知府廉昌。巴陵縣知縣胡方穀。岳州營參將阿克東阿。均著先行革職。交刑部按律議罪。名具奏。蒲圻縣城存兵僅四百名。賊眾大至。以致失守。知縣周和祥。罵賊不屈。被戕甚慘。不愧守土之官。嘉獎之餘。實堪憐憫。周和祥著賞加道銜。照道員例賜卹。並於蒲圻縣建立專祠。以慰忠魂。同時殉難之縣丞。千總。及陣亡之帶兵將備二員。均著查明請卹。並附於周和祥專祠。以昭旌獎。又據台湧奏。荆宜施道文輝。在白螺磯分防駐守。不能

督兵堵剿。退離防所。著徐廣縉。常大瀄。查明參奏。其餘退避各員弁。並著查明分別參奏。台湧著交部議處。向榮計抵武昌。福興。玉山。蘇布通阿等。追剿之兵。計亦到齊。徐廣縉著毋庸株守湘陰。仍遵前旨。兼程馳赴武昌一帶。督率兵勇。與常大瀄。前後夾攻。毋得再有遲誤。岳州府城著羅繞典。張亮基。鮑起豹等。酌量帶兵前往收復。並撫綏難民。毋令失所。武昌下游。朕已諭令陸建瀛。統帶大兵。泝流而上。信陽以北。復令琦善帶兵。兼程前進。會合兜剿。並調集東三省勁旅。前往接應。誓必滅此羣醜。以彰天討。而快人心。漢陽失守情形。文武如何下落。並著該大臣等。查明速奏。傷亡兵丁。照例議卹。○



又諭。桂良奏。遵旨保舉堪資軍營差遣協領一摺。福州鑲藍旗滿洲協領都爾遜。著發往軍營。交徐廣縉差遣委用。○諭軍機大臣等。據徐廣縉馳奏。追剿賊匪情形。並漢陽失守一摺。岳州為南北咽喉。該匪既紛紛竄去。即應趕緊收復。著即由湖南酌調文武大員。來岳州駐劄。分兵固守。堵賊回竄之路。萬不可再有疏失。漢陽與武昌。僅隔一江。逆匪既踞漢陽。則武昌更形危急。省垣重地。且為南北關鍵。四通八達之區。所關甚鉅。著徐廣縉帶領南省追兵。星速至漢陽。武昌一帶。合力攻剿。常大瀉。雙福。當督飭在城文武。竭力守禦。並與城外救援各將密商。內外夾擊。萬勿株守城中。一籌莫展。致誤

事機。土匪晏仲武。勾結逆賊。圍搶餉鞘。該大臣業經派委鄧紹良等。帶兵勦辦。此股匪徒。諒不難剋期殄滅。現在楚北軍情。著徐廣縉隨時飛咨河南。江西。安徽。江甯。各督撫。準備兜剿。三面圍擊。不可任令竄逸。復致滋蔓難圖。台湧駐劄荊州。據江上游。著一面擇要防守。無令股匪竄入。仍一面派委得力水師兵船。順江直下。應援武昌。毋稍遲誤。廉昌等棄城而逃。情節可惡。已命刑部按律治罪。巴圖解餉。如何被劫。著查明參奏。通判鄭德基。守備王福海。尚能保護十餘萬軍餉。送至省城。不致為賊所掠。著徐廣縉酌量保奏。將此由六百里各諭令知之。○又諭。逆匪撲入漢陽。沿江下游地方。在在堪



虞情形十分緊要。已諭令徐廣縉兼程前進。迅速兜剿矣。著陸建瀛酌帶江南水陸官兵。即馳赴上游。與徐廣縉常大瀆等合力夾擊。江防利用火攻。務將槍礮火箭火礮等件配帶齊全。以期應用。尤須派帶得力將弁。毋得以庸懦濫充。江蘇安徽江西一帶。均當亟為設備。自固藩籬。著楊文定。蔣文慶。張芾。遵照疊次諭旨。妥籌布置。互相應援。至陸路各要隘。尤恐有土匪勾結。並著一體嚴防。毋致稍有疏失。將此由六百里各諭令知之。○又諭。本日據徐廣縉奏。賊匪北竄。漢陽府城失守。督兵進剿等語。楚豫交界地方。最關緊要。急應嚴密防堵。著陸應穀。即遵前旨。親往要隘處所。督飭文武員弁。實力嚴防。無任賊匪闖入。並著琦善兼程前進。陳金綬亦即飛催所調各路官兵。星速進行。毋得稍有遲誤。所有火器營官兵四十名。火箭二千枝。並各旗營火藥二萬斤。即著琦善酌量差遣應用。河南兵餉。前已先由戶部籌撥矣。將此由六百里各諭令知之。○浙江學政萬青藜奏。藩司椿壽留有遺囑。實因公事棘手。遽行自盡。得旨。已有旨令黃宗漢詳查具奏。汝近在省垣。若有所聞。亦可據實具奏。○撫恤琉球國遭風難夷。如例。○甲戌。

上幸瀛臺。○諭內閣。因慶奏。遵旨保舉吉林各城。堪資軍營差遣人員一摺。拉林協領兼雲騎尉台斐音保。烏拉鑲紅旗佐



領獎賞藍翎台祿甯古塔鑲白旗佐領常陞。伯都訥鑲白旗  
佐領輯順。鑲藍旗佐領金山。吉林正藍旗防禦開奇哩。甯古  
塔正藍旗防禦忠春。三姓正紅旗防禦慶春。拉林正黃旗防  
禦恩林。吉林蒙古鑲白旗驍騎校哈勒洪阿。三姓正黃旗驍  
騎校巴圖魯。正紅旗驍騎校獎賞花翎蘇隆阿。阿勒楚喀鑲  
藍旗驍騎校永祥。並降調之前任正黃旗副都統兼呼倫貝  
爾總管德昌。著該將軍即派令管帶前備吉林馬隊精兵二  
千名。配齊軍裝器械。候旨調撥。均無庸送部引見。○又諭。慧  
成奏。幫船進牕。有礙挑工。恐誤重運一摺。本年浙江幫船。回  
空已遲。自應催趲迅速南旋。據稱運河挑工。關係明年運道。

若築壩過遲。恐誤重運。浙江十三幫。能於十一月內趕至臨  
清。尚可進牕催行。儻遲至十二月。即擬令在牕外守凍。自係  
實在情形。惟現在天氣和暖。該河督仍當隨時察看。會同李  
德。熟籌妥辦。俾幫船不致全行阻凍。挑工亦無貽誤。方為妥  
善。○諭軍機大臣等。張芾奏。崇仁等縣會匪滋事。委員馳往  
會拏一摺。現在楚省逆匪未靖。江西界連各處。屢次諭令嚴  
密防堵。稽察奸細。此種會匪。糾眾滋事。經官兵緝拏。膽敢持  
械抗拒。且起有旗幟偽示等件。難保不與楚匪勾結。亟宜嚴  
拏懲治。以免貽害。現經張芾商同陳孚恩。選撥兵勇。派委文  
武各員。前往勦捕。辦理尚合機宜。著即嚴飭各委員等。督率



兵勇迅速撲滅。毋任延蔓。務將首從各犯悉數弋獲。解省嚴行訊究。從重懲辦。將此諭令知之。○改鑄四川建武營都司改設平安新營守備條記。從總督徐澤醇請也。○以派赴河南軍營賞火器營營總德克金布等銀兩有差。○緩徵吉林三姓被水地畝。應完上年銀穀。○緩徵江西南昌新建進賢玉山餘干五縣被水被旱地畝。本年額賦並展緩南昌新建豐城建昌安義德化德安瑞昌湖口彭澤進賢十一縣節年緩徵正雜額賦。○撫恤朝鮮國遭風難夷。如例。○乙亥。

上詣

壽安宮西所問

如皇貴太妃安。○詣

壽康宮問

皇貴太妃安。○諭內閣。已革廣西提督向榮。自抵廣西軍營。節次勦賊獲勝。雖間有挫衄。而每遇接仗。尚能身先士卒。本年桂林。長沙。省城。先後被圍。向榮均有守禦之勞。現在逆匪攻撲武昌。亦經向榮先派常祿。王錦繡。帶兵赴援。並親督兵勇。追至蒲圻。福興。玉山。蘇布通阿等。皆出其後。是向榮督兵勦賊。雖未見成效。究屬老於行陣。臨事尚知機警。該員前因規避獲咎。因念將材難得。朕旋即加恩。停其發遣。命赴湖南軍前。戴罪立功。經徐廣縉。派令總統諸軍。昨又降旨。剴切訓諭。



令會同蘇布通阿。共籌勦賊事宜。並諭徐廣縉。將此旨宣示。該員具有天良。諒必知感。知奮。朕復博稽眾論。皆以向榮屢保危城。緩急可恃。宜專委任。以重責成。與朕所見。適相符合。向榮即著免其發遣。並賞還提督銜。幫辦軍務。提鎮以下。悉聽節制。迅即統帶大兵。馳赴武昌。解省城之圍。並杜賊奔竄之路。凡湖南軍營得力將弁。並准酌量撤調來營。以備差遣。向榮經此次破格任用。宜如何感恩圖報。果能迅掃妖氛。即可懋邀恩賞。儻始終不知奮勉。朕惟有執法從事。決不姑容。懍之勉之。○諭軍機大臣等。陸應穀奏。請飭分守要隘等語。南陽信陽相距六百餘里。自應分路籌防。鄭敦謹著即遵前

旨。赴信陽州一帶防堵。其南陽一帶。即著柏山專辦。琦善未到任以前。所有籌防應辦事宜。著陸應穀妥速辦理。琦善陳金綬現已啟程。到河南後。應如何扼要駐劄。及分撥調度。進勦之處。著琦善等體察情形。相機籌辦。總期內資保衛。防勦兼施。方為不負委任。將此由五百里各諭令知之。○又諭。賊匪肆擾。自粵而楚。已逾兩載。現復竄入岳州。漢陽擾及武昌。曼經降旨。令徐廣縉統率大兵。繞出賊前。會同毗連各省之督撫。三路兜勦。因思賊起粵西。沿途裹脅固多。而首要各匪。總以粵西為巢穴。大股出巢。其老弱必不能悉數遠出。且難保無渠魁踞巢。為黨與歸竄地步。前據勞崇光奏。鬱林賊匪。



勦除殆盡。南太一帶亦漸就肅清。而伏莽尚多。若不及早挖捕。恐貽後患。著葉名琛。勞崇光。會同密查賊巢所在。及賊匪餘黨。合力挖捕。毋令一名漏網。其有縛獻賊黨者。免罪。其親族家屬縛獻者。免連坐。縛獻首要者。予重賞。或雜伏良民之中。紳士義勇。及平民縛獻。或密行報官者。分別優獎。並諭令地方官。嚴查保甲。勿因賊匪遠竄。稍涉大意。緝獲各犯。嚴行審究首逆。及著名賊目姓名。有無偽託。並飭屬密訪孽種墳墓。現在何處。盡行掘發。以消逆燄。而除戾氣。將此由五百里各諭令知之。○又諭。昨據徐廣縉查奏。岳州失守情形。與漢陽相繼失守。當有旨。令該大臣迅赴武昌一帶。與常大瀆內

外夾攻。並令台灣一體設法應援矣。細閱徐廣縉摺稱。向榮出隊。逼近岳州。城內賊匪紛紛逃竄。追趕二十餘里。而岳州府縣如何下落。仍未據探確實。該大臣近在湘陰。於逆匪突入岳州。有無頭目在內。其大隊係何匪督領。竄出之後。是否尚有餘賊在城占踞。向榮一路追勦。在後之福興。玉山。蘇布通阿等。何以不將岳州收復。賊既遠竄。則文武員弁存亡。應有確信。何以仍無稟報。且稱該匪大隊去遠。何以又稱趕調弁兵。前赴岳州督勦。是岳州之應否攻勦。抑已收復。該大臣尚無聞見。奏報均未明晰。至漢陽相繼失陷。並無月日及詳細情形。究竟現在逆匪分為幾股。其陸路由蒲圻。咸甯。與水



路沿江而下之賊。作何分合。係何頭目統帶。武昌省城。係十二日被攻。十九日報到。至今旬餘。未得續報。朕心焦灼難言。逆首洪秀泉。楊秀青。馮雲山。蕭朝濱。羅亞旺等。是否確在賊營。何賊分撲武昌。漢陽。現在賊眾多寡。漢陽城守文武。如何下落。該匪陷漢陽後。是否又竄他處。該大臣統率全軍。兼轄兩省。自應通籌兼顧。勿再遲緩失機。著即確查。一一具奏。仍親督大兵。由間道繞赴武昌。下游險隘。扼定該匪去路。必須水陸並勦。勿令該匪再行奪險占踞。仍與向榮渡江之軍。併力攻擊漢陽之賊。琦善已馳赴河南。陸建瀛亦沂江迎擊。該大臣等。三面攻勦。定可立殄羣兇。湖南賊匪。與各縣小股土

匪。著責成張亮基。鮑起豹。盡數擒捕。並確探岳州賊匪。如未盡竄。即嚴飭將弁。趁其攻擾湖北之時。趕緊兜圍。迅速收復。此舉最為緊要。湖北荊州一帶。雖有台湧防堵。尚覺空虛。著羅繞典。揀帶得力文武員弁兵勇。馳赴襄陽。與荊州水陸各兵。表裏密防。遏賊西竄。俾不得由漢江北駛。則徐廣縉。向榮。援救武昌。漢陽之兵。可資得力。前任丁憂侍郎曾國藩。籍隸湘鄉。現聞在籍。其於湖南地方人情。自必熟悉。著該撫傳旨。令其幫同辦理本省團練鄉民。按查土匪諸事務。伊必盡力。不負委任。雲南遊擊陳得功。都司安如嵩。著查明如未帶兵來楚。即咨該省督撫。飭調來楚。以資差遣。連日據侍郎呂賢



寶錄卷之十一  
基。太常寺少卿雷以誠條奏軍務各摺片。多有可採之處。著摘要鈔給該大臣等閱看。將此由六百里諭知徐廣縉。台湧。羅繞典。張亮基。常大瀉。駱秉章。並諭向榮。雙福。鮑起豹。蘇布通阿。福興。知之。○以明年重興恩榮筵宴。賞予告大學士潘世恩。

御書扁額。曰瓊林人瑞。○調陝西提督福珠洪阿。仍為江南提督。江南提督雙福。為湖北提督。烏魯木齊提督桂明。為陝西提督。○命江南徐州鎮總兵官張殿元。留署廣東潮州鎮總兵官。以兩江督標中軍副將程三光。為江南徐州鎮總兵官。○賞順天等省鄉試年老諸生于學乾等七十八人。舉人副

榜有差。



大清文宗協天翊運執中垂謨懋德振武聖孝淵恭端仁寬敏  
顯皇帝實錄卷之七十七



